

O‘ZBEKISTONDA YASHIL MOLIYANI RIVOJLANTIRISH ISTIQBOLLARI

Abdusalomova Dilnavoz Soibjon qizi

Toshkent amaliy fanlar universiteti

Iqtisodiyot fakulteti, moliya va Moliyaviy
texnologiyalar yo‘nalishi 4-bosqich talabasi

E-mail: dilnavozabdusalomova8@gmail.com

<https://doi.org/10.5281/zenodo.22804505>

Qabul qilindi: 9-sentabr 2026-yil • Ma’qullandi: 15-sentabr 2026-yil • Nashr qilindi: 16-sentabr 2026-yil

Annotatsiya

Ushbu maqolada O‘zbekistonda yashil moliyani rivojlantirishning hozirgi holati, bor imkoniyatlari va kelajakdagi istiqbollari tahlil qilinadi. Tadqiqotda iqtisodiyotning barqaror rivojlanishini ta’minlash, iqlim o‘zgarishining salbiy oqibatlarini kamaytirish va ekologik loyihalarni moliyaviy qo‘llab-quvvatlashda yashil moliyaning ahamiyati yoritilgan. Shuningdek, qayta tiklanuvchi energiya manbalarini rivojlantirish, energiya samaradorligini oshirish, resurslardan oqilona foydalanish va past uglerodli iqtisodiyotga o‘tish jarayonlarini moliyalashtirish masalalariga e’tibor qaratilgan. O‘zbekistonda yashil obligatsiyalar, imtiyozli kreditlar, xalqaro moliyaviy institutlar mablag‘lari va xususiy investitsiyalar kabi moliyaviy instrumentlardan foydalanish imkoniyatlari ko‘rib chiqilgan. Tadqiqot natijasida yashil moliya bozorini rivojlantirish uchun huquqiy va institutsional mexanizmlarni takomillashtirish, moliyaviy resurslarni yashil loyihalarga yo‘naltirish hamda investorlar uchun qulay shart-sharoitlar yaratish muhim ekanligi asoslab berilgan. Maqolada O‘zbekistonda yashil moliyani rivojlantirish mamlakatning ekologik barqarorligi bilan bir qatorda, yangi investitsiya imkoniyatlarini shakllantirish va uzoq muddatli iqtisodiy o‘sishni ta’minlashning muhim omili deb baholanadi.

Kalit so‘zlar:

yashil moliya, yashil iqtisodiyot, yashil investitsiyalar, yashil obligatsiyalar, barqaror rivojlanish, qayta tiklanuvchi energiya, ekologik loyihalar, moliyaviy mexanizmlar, iqlim o‘zgarishi, O‘zbekiston.

Kirish:

Bugungi kunda iqtisodiy rivojlanish jarayonida atrof-muhitni muhofaza qilish va moliyaviy barqarorlikni birgalikda ta’minlash muhim masalalardan biriga aylanmoqda. Iqlim o‘zgarishi, tabiiy resurslardan foydalanishning ortib borishi, energiyaga bo‘lgan talabning oshishi hamda ekologik muammolarning kuchayishi mamlakatlardan iqtisodiy o‘sish bilan bir qatorda ekologik barqarorlikka ham e’tibor qaratishni talab qilmoqda. Shu sababli moliyaviy resurslarni ekologik jihatdan foydali loyihalarga yo‘naltirishga asoslangan yashil moliya tushunchasi bugungi moliya tizimining muhim yo‘nalishlaridan biri sifatida shakllanmoqda. Yashil moliya orqali qayta tiklanuvchi energiya manbalarini rivojlantirish, energiya samaradorligini oshirish, chiqindilarni kamaytirish va tabiiy resurslardan oqilona foydalanishga qaratilgan loyihalarni moliyalashtirish imkoniyati kengayadi. Bunda bank kreditlari, yashil obligatsiyalar, investitsiyalar, xalqaro moliya institutlari mablag‘lari va boshqa moliyaviy vositalardan foydalanish mumkin. Shu jihatdan yashil moliya nafaqat ekologik muammolarni kamaytirish vositasi, balki yangi investitsiyalarni jalb qilish va iqtisodiy rivojlanishning uzoq muddatli barqarorligini ta’minlash mexanizmi sifatida ham ahamiyat kasb etmoqda. O‘zbekistonda ham yashil iqtisodiyotga o‘tish va ekologik loyihalarni moliyaviy qo‘llab-quvvatlash masalalariga so‘nggi yillarda katta e’tibor qaratilmoqda. Xususan, 2025-yilga mo‘ljallangan davlat dasturida mamlakatda yashil moliyalashtirish tizimini shakllantirish bo‘yicha Milliy dastur ishlab

chiqish vazifasi belgilangan. Shuningdek, yashil va past uglerodli rivojlanish loyihalarini amalga oshirish uchun xalqaro moliya institutlaridan imtiyozli kreditlar va grant mablag'larini jalb qilishga alohida e'tibor qaratilgan [1]. Mamlakat moliya sektorida iqlim bilan bog'liq moliyaviy xatarlarni hisobga olish masalasi ham tobora dolzarb bo'lib bormoqda. O'zbekiston Respublikasi Markaziy banki tomonidan 2025–2027-yillarga mo'ljallangan iqlim tavakkalchiliklarini boshqarish strategiyasining ishlab chiqilishi moliya tizimining ekologik va iqlim omillariga moslashuvini kuchaytirishga qaratilgan muhim qadamlardan biridir [2]. Bu esa banklar va boshqa moliyaviy tashkilotlar faoliyatida ekologik omillarni hisobga olish hamda moliyaviy resurslarni barqaror loyihalarga yo'naltirish zaruratini oshirmoqda. O'zbekistonda qayta tiklanuvchi energiya manbalaridan foydalanishni kengaytirish, energiya samaradorligini oshirish va ekologik toza texnologiyalarni joriy etish uchun katta miqdorda investitsiya talab etiladi. Shu sababli davlat mablag'lari bilan bir qatorda xususiy investitsiyalar, bank kreditlari, yashil obligatsiyalar va xalqaro moliyaviy resurslardan samarali foydalanish muhim ahamiyatga ega. Yashil moliya mexanizmlarining rivojlanishi ushbu mablag'larni ekologik va iqtisodiy jihatdan samarali loyihalarga yo'naltirish imkoniyatini kengaytirishi mumkin. Shu nuqtai nazardan, O'zbekistonda yashil moliya bozorining shakllanishi, mavjud moliyaviy instrumentlardan foydalanish darajasi, rivojlanishga to'sqinlik qilayotgan muammolar va kelgusidagi imkoniyatlarni o'rganish muhim ilmiy va amaliy ahamiyatga ega. Mazkur maqolada O'zbekistonda yashil moliyaning rivojlanish holati va istiqbollari tahlil qilinib, yashil moliya bozorini yanada rivojlantirish, ekologik loyihalarga investitsiyalarni jalb qilish va moliyaviy mexanizmlarni takomillashtirish bo'yicha takliflar ishlab chiqishga e'tibor qaratiladi.

Adabiyotlar sharhi. Yashil moliya masalasi so'nggi yillarda iqtisodiyot va moliya sohasidagi ilmiy tadqiqotlarning muhim yo'nalishlaridan biriga aylanib bormoqda. Mavjud tadqiqotlarda yashil moliyaning asosiy vazifasi moliyaviy resurslarni atrof-muhitga salbiy ta'siri kam bo'lgan, energiya samaradorligini oshiradigan va barqaror rivojlanishga xizmat qiladigan loyihalarga yo'naltirish bilan izohlanadi. Shu bilan birga, yashil obligatsiyalar, bank kreditlari, investitsiya fondlari va boshqa moliyaviy vositalarning ekologik loyihalarni moliyalashtirishdagi o'rnini ham keng o'rganilmoqda. O'zbekiston bo'yicha olib borilgan tadqiqotlarda yashil moliyaning rivojlanishi, ayniqsa, kapital bozori va yashil obligatsiyalar bilan bog'liq imkoniyatlar orqali ko'rib chiqilgan. OECD tadqiqotlarida O'zbekistonning yashil transformatsiyasini moliyalashtirishda yashil obligatsiyalar va boshqa moliyaviy instrumentlardan foydalanish kapital bozorini chuqurlashtirish hamda qo'shimcha investitsiyalarni jalb qilish imkonini berishi qayd etilgan [3]. Bu yondashuv O'zbekiston uchun yashil moliyani faqat bank kreditlari bilan cheklab qo'ymasdan, kapital bozori orqali ham rivojlantirish zarurligini ko'rsatadi. O'zbekistonda yashil obligatsiyalar amaliyotining shakllanishi ham mazkur yo'nalishdagi muhim bosqichlardan biridir. 2023-yilda mamlakat tomonidan ilk suveren yashil yevroobligatsiyalarning London fond birjasida joylashtirilishi yashil loyihalarni xalqaro kapital bozori orqali moliyalashtirish imkoniyatlari mavjudligini ko'rsatdi. Keyingi yillarda ushbu tajriba yashil moliya bozorini kengaytirish uchun muhim asos sifatida qaralmoqda [4]. 2025–2026-yillardagi tadqiqotlarda esa yashil moliya masalasiga yanada kengroq yondashuv kuzatilmoqda. Xususan, O'zbekistonda yashil moliya bozorini rivojlantirish bilan bir qatorda, banklarning ekologik va iqlim bilan bog'liq xatarlarni baholash imkoniyatlarini kuchaytirish, ESG tamoyillarini moliyaviy faoliyatga kiritish hamda yashil loyihalar uchun yetarli moliyaviy resurslarni shakllantirish masalalari muhim bo'lib bormoqda. 2025-yilda GGGI tomonidan O'zbekistondagi banklar uchun yashil bank faoliyati va ESG tamoyillarini joriy etishga qaratilgan salohiyatni oshirish ishlari olib borilgani ham ushbu yo'nalishning amaliy ahamiyati ortib borayotganini ko'rsatadi [5]. 2026-yilgi ilmiy yondashuvlarda yashil moliyani faqat ekologik loyihalarga mablag' ajratish vositasi sifatida emas, balki iqtisodiyotni tarkibiy o'zgartirishga xizmat qiluvchi moliyaviy mexanizm sifatida baholash kuchaymoqda. Shu sababli yashil obligatsiyalarni rivojlantirish, banklarning yashil kreditlash imkoniyatlarini kengaytirish, investorlar uchun aniq va ishonchli ma'lumotlar tizimini shakllantirish hamda ekologik loyihalarni baholash mezonlarini takomillashtirish O'zbekiston uchun dolzarb vazifalardan hisoblanadi. Umuman olganda, mavjud adabiyotlar O'zbekistonda yashil moliyani rivojlantirish uchun zarur imkoniyatlar shakllanayotganini ko'rsatadi. Biroq yashil moliya instrumentlarining amaliy qo'llanilishi, xususiy kapitalni jalb qilish, banklarning yashil moliyalashtirishdagi ishtiroki va ekologik loyihalarning samaradorligini baholash masalalari hali yanada chuqurroq tadqiq etishni talab qiladi.

Shu sababli ushbu maqolada O'zbekistonda yashil moliyaning mavjud holati bilan bir qatorda, uning rivojlanishiga ta'sir qiluvchi omillar va kelgusidagi istiqbollarni kompleks ravishda ko'rib chiqishga e'tibor qaratiladi.

Asosiy qism: O'zbekistonda yashil moliyaning hozirgi holati

O'zbekistonda yashil moliyaning rivojlanishi iqtisodiyotni modernizatsiya qilish, energiya samaradorligini oshirish va tabiiy resurslardan oqilona foydalanish jarayonlari bilan bog'liq. Qayta tiklanuvchi energiya, suvni tejash, energiya samaradorligi va ekologik infratuzilmani rivojlantirish kabi loyihalarni amalga oshirish katta miqdordagi investitsiyalarni talab qiladi. Shu sababli davlat mablag'lari bilan bir qatorda xususiy kapital va xalqaro moliyaviy resurslarni jalb qilish muhim ahamiyatga ega. Jahon bankining O'zbekiston bo'yicha tahlilida yashil transformatsiyani moliyalashtirishda davlat va xususiy sektor mablag'larini birgalikda safarbar qilish zarurligi ta'kidlangan. Qayta tiklanuvchi energiya, barqaror qishloq xo'jaligi, iqlimga chidamli infratuzilma va yashil uy-joy istiqbolli yo'nalishlar sifatida ko'rsatilgan [6]. O'zbekistonda yashil moliyaning amaliy rivojlanishining muhim ko'rsatkichlaridan biri yashil va barqaror obligatsiyalar bozorining shakllanishidir. 2024-yilda Sanoat Qurilish Banki va Agrobank tomonidan xalqaro kapital bozorida yashil hamda barqaror obligatsiyalar chiqarildi. GGGI ma'lumotlariga ko'ra, ushbu ikki bank tomonidan chiqarilgan tematik obligatsiyalarning umumiy qiymati 1 milliard AQSh dollariga teng bo'lgan [7]. Agrobank tomonidan jalb qilingan mablag'lar asosan iqlimga mos qishloq xo'jaligi, suvni tejash va energiya samaradorligi loyihalariga yo'naltirilgan. Bu yashil moliyaning ekologik manfaat bilan bir qatorda, ishlab chiqarish xarajatlarini kamaytirish va xo'jalik faoliyati samaradorligini oshirishga ham xizmat qilishi mumkinligini ko'rsatadi [8].

Yashil moliyaning asosiy instrumentlari

O'zbekistonda yashil moliyani rivojlantirish uchun turli moliyaviy instrumentlardan foydalanish mumkin. Ularning asosiylari quyidagilardan iborat:

Yashil moliya instrumenti	Asosiy vazifasi	O'zbekistondagi qo'llanish sohasi
Yashil obligatsiyalar	Ekologik loyihalar uchun kapital jalb qilish	Banklar va yirik korxonalar
Yashil kreditlar	Ekologik loyihalarni kreditlash	Energetika, qishloq xo'jaligi, kichik biznes
Xalqaro kredit va grantlar	Yirik loyihalarni moliyalashtirish	Energetika, suv xo'jaligi, infratuzilma
Xususiy investitsiyalar	Yashil biznesga kapital kiritish	Innovatsion va ekologik loyihalar
Yashil ipoteka	Energiya samarador uy-joylarni moliyalashtirish	Uy-joy sektori

Jadval muallif tomonidan tuzildi.

Yashil moliyalashtirishning kichik va o'rta biznesga kengayishi ham muhim. Osiyo taraqqiyot bankining Ipak Yo'li banki bilan amalga oshirilayotgan loyahasida ajratilgan mablag'larning kamida 10 foizini yashil moliyalashtirishga yo'naltirish belgilangan [9]. Bu yashil moliya imkoniyatlarini yirik korxonalar bilan cheklamasdan, kichik biznesga ham kengaytirish mumkinligini ko'rsatadi. Uy-joy sektorida ham yashil moliyalashtirish imkoniyatlari mavjud. Osiyo taraqqiyot banki O'zbekistonda energiya samaradorligini oshirish va uy-joylarni yashil renovatsiya qilishga qaratilgan moliyalashtirish mexanizmlarini rivojlantirishni qo'llab-quvvatlamogda [10].

Yashil moliyani rivojlantirishdagi muammolar

O'zbekistonda yashil moliyani rivojlantirishda bir qator muammolar mavjud. Avvalo, ekologik loyihalarning boshlang'ich xarajatlari yuqori bo'lishi mumkin. Quyosh panellari, energiya tejankor uskunalari va suvni tejaydigan texnologiyalar uchun katta boshlang'ich mablag' talab qilinishi aholining va kichik biznesning bunday loyihalarga kirishini cheklashi mumkin. Yana bir muhim masala — moliya institutlarining yashil loyihalarni baholash tajribasidir. Bunday loyihalarda nafaqat moliyaviy natija, balki energiya va suvni tejash, chiqindilarni kamaytirish hamda ekologik

samaradorlik kabi ko'rsatkichlarni hisobga olish talab etiladi. Shu sababli yashil loyihalarni baholash mezonlarini takomillashtirish muhim hisoblanadi. Bundan tashqari, investorlar uchun yashil loyihalar va ularning natijalari to'g'risidagi ma'lumotlarning ochiqligi muhim. O'zbekistonda yashil taksonomiyaning rivojlantirilishi ekologik loyihalarni yagona mezonlar asosida aniqlash va yashil moliyalashtirishning shaffofligini oshirishga xizmat qilishi mumkin [11]. Iqlim o'zgarishi bilan bog'liq moliyaviy xatarlarni hisobga olish ham dolzarb masalalardan biridir. Markaziy bank tomonidan iqlim xatarlarini moliyaviy tizimda baholash va boshqarishga e'tibor qaratilayotgani bank sektorining kelgusidagi faoliyatida ushbu omillarning ahamiyati ortib borayotganini ko'rsatadi [12]. Shunday qilib, O'zbekistonda yashil moliya bozorining shakllanishi uchun dastlabki amaliy mexanizmlar mavjud bo'lsa-da, uning yanada kengayishi moliyaviy instrumentlarni diversifikatsiya qilish, banklarning yashil kreditlash imkoniyatlarini oshirish, xususi investorlarni jalb qilish va yashil loyihalarni baholash tizimini takomillashtirish bilan bog'liq.

Xulosa va takliflar: O'tkazilgan tahlil natijalari O'zbekistonda yashil moliyani rivojlantirish uchun zarur bo'lgan dastlabki moliyaviy va institutsional asoslar shakllanayotganini ko'rsatadi. Yashil va barqaror obligatsiyalarning amaliyotga kirib kelishi, banklar tomonidan ekologik loyihalarni moliyalashtirishga e'tiborning ortishi hamda xalqaro moliya institutlari bilan hamkorlikning kengayishi ushbu yo'nalishda ijobiy o'zgarishlar yuz berayotganidan dalolat beradi. Shu bilan birga, yashil moliya bozori hali rivojlanish bosqichida bo'lib, mavjud imkoniyatlardan to'liq foydalanish uchun moliyaviy va institutsional mexanizmlarni yanada takomillashtirish zarur. Yashil moliyani rivojlantirish O'zbekiston uchun faqat ekologik muammolarni kamaytirish vositasi sifatida qaralmasligi kerak. Mazkur yo'nalish yangi investitsiyalarni jalb qilish, energiya xarajatlarini kamaytirish, zamonaviy texnologiyalarni joriy etish va iqtisodiyotning uzoq muddatli raqobatbardoshligini oshirishga ham xizmat qilishi mumkin. Ayniqsa, qayta tiklanuvchi energiya, suvni tejash, yashil transport, energiya samarador qurilish va ekologik qishloq xo'jaligini moliyalashtirish istiqbolli yo'nalishlar hisoblanadi. Yashil loyihalarni investorlar uchun yanada ochiq va tushunarli qilish maqsadida yagona raqamli platforma yaratish maqsadga muvofiq. Bunday platformada loyiha qiyamati, zarur investitsiya miqdori, kutilayotgan iqtisodiy samarasi, energiya yoki suvni tejash ko'rsatkichi hamda ekologik natijalari haqida ma'lumotlar joylashtirilishi mumkin. Bu investorlarning loyiha tanlash jarayonini yengillashtirib, yashil investitsiyalar shaffofligini oshiradi. Banklarda yashil kreditlar uchun differensial foiz stavkalarini qo'llash ham samarali mexanizmlardan biri bo'lishi mumkin. Ekologik samaradorligi yuqori bo'lgan loyihalarga nisbatan qulayroq kredit shartlarini taklif qilish korxonalar va aholining energiya tejamkor hamda ekologik texnologiyalarga bo'lgan qiziqishini oshiradi. Kichik va o'rta biznesni yashil moliyaga kengroq jalb qilish uchun maxsus kafolat mexanizmlarini rivojlantirish lozim. Garov ta'minoti yoki boshlang'ich mablag'i yetarli bo'lmagan, biroq iqtisodiy va ekologik jihatdan istiqbolli loyihalarga davlat yoki maxsus moliyaviy institutlar tomonidan kafolat berilishi ularning kredit olish imkoniyatini oshirishi mumkin. Yashil obligatsiyalar bozorini kelgusida faqat yirik banklar bilan cheklab qo'ymasdan, energetika, transport, qurilish va sanoat korxonalariga ham kengaytirish zarur. Buning uchun obligatsiyalar chiqarish jarayonini qulaylashtirish, investorlar uchun ishonchli axborot tizimini yaratish va xalqaro standartlarga mos hisobot mexanizmlarini rivojlantirish muhimdir. Yashil moliyaning samarali ishlashi uchun mutaxassislarining bilim va ko'nikmalarini oshirish ham katta ahamiyatga ega. Oliy ta'lim muassasalarida ESG, iqlim moliyasi, yashil investitsiyalar va barqaror moliyaviy hisobot bo'yicha amaliy bilimlarni kuchaytirish kelajakda ushbu sohada malakali kadrlar yetishib chiqishiga yordam beradi. Bundan tashqari, yashil loyihalarga ajratilgan mablag'lardan foydalanish va ularning ekologik natijalarini raqamli monitoring qilish tizimini joriy etish maqsadga muvofiq. Bunda loyiha uchun ajratilgan mablag', amalga oshirilgan ishlar, energiya va suv tejalishi hamda ekologik samaradorlik kabi ko'rsatkichlar muntazam nazorat qilinishi mumkin. Bunday tizim investorlar va moliya institutlarining yashil loyihalarga bo'lgan ishonchini oshiradi. Aholining yashil moliyaviy savodxonligini oshirish ham alohida ahamiyatga ega. Fuqarolarga quyosh panellari, energiya tejamkor uy-joy, elektr transport vositalari va boshqa ekologik texnologiyalarni moliyalashtirish imkoniyatlari haqida sodda va tushunarli ma'lumotlar berilishi yashil moliyaga bo'lgan talabni oshirishi mumkin. Umuman olganda, O'zbekistonda yashil moliyaning kelajakdagi rivojlanishi yangi moliyaviy instrumentlarni joriy etish bilan bir qatorda, davlat, banklar, xususi investorlar, xalqaro moliya

institutlari va aholining hamkorligini kuchaytirishni talab qiladi. Yashil moliya iqtisodiy manfaatlarni ekologik mas'uliyat bilan uyg'unlashtirgan holda rivojlantirilsa, u mamlakatning barqaror iqtisodiy o'sishi, investitsion jozibadorligi va ekologik xavfsizligini ta'minlashda muhim moliyaviy mexanizmga aylanishi mumkin.

Adabiyotlar, References, Литературы:

1. O'zbekiston Respublikasi Prezidentining qarori. "O'zbekiston Respublikasida yashil iqtisodiyotga o'tish strategiyasini amalga oshirish bo'yicha chora-tadbirlar to'g'risida". – Toshkent, 2022.
2. O'zbekiston Respublikasi Markaziy banki. Monetary Policy Guidelines for 2025 and 2026–2027. – Toshkent, 2024.
3. OECD. Financing Uzbekistan's Green Transition: Capital Market Development and Opportunities for Green Bond Issuance. – Paris: OECD Publishing, 2023.
4. OECD. Towards Orderly Green Transition: Investment Requirements and Managing Risks to Capital Flows. – OECD Business and Finance Policy Papers, No. 57, 2023.
5. OECD. Mechanisms to Prevent Carbon Lock-in in Transition Finance. – Paris: OECD Publishing, 2023.
6. World Bank. Prime Picks for a Green Pivot: Uzbekistan State Funds for Climate Action. – Washington, DC: World Bank, 2024.
7. Global Green Growth Institute (GGGI). Advancing Sustainable and Green Finance in Uzbekistan through Thematic Bonds. – 2026.
8. Global Green Growth Institute (GGGI). Agrobank Publishes the First-year Results of the Green Bonds. – 29 September 2025.
9. Asian Development Bank. Bank Ipak Yuli Supporting Sustainable and Inclusive Access to Finance Project (Project No. 58044-001). – Manila: ADB, 2024.
10. Asian Development Bank. Uzbekistan: Green Mortgage and Housing Energy Efficiency Project. – Manila: ADB.
11. Global Green Growth Institute (GGGI). Bridging the Gaps of Climate Finance in Central Asia: Climate Finance Gap Assessment with Recommendations for Uzbekistan. – GGGI, 2025–2026.
12. Global Green Growth Institute (GGGI). Sustainable and Green Finance in Uzbekistan: Thematic Bonds and Climate-Smart Investment. – Tashkent, 2026.

ПЕРСПЕКТИВЫ РАЗВИТИЯ ЗЕЛЕННОГО ФИНАНСИРОВАНИЯ В УЗБЕКИСТАНЕ

Абдусаломова Дилнавоз Сойибжон кизи
Ташкентский университет прикладных наук
Факультет экономики, направление «Финансы
и финансовые технологии», студентка 4 курса
E-mail: dilnavozabdusalomova8@gmail.com

Аннотация:

В данной статье анализируются современное состояние, существующие возможности и перспективы развития зеленого финансирования в Узбекистане. В исследовании рассматривается значение зеленого финансирования в обеспечении устойчивого развития экономики, снижении негативных последствий изменения климата и финансовой поддержке экологических проектов. Особое внимание уделено вопросам финансирования развития возобновляемых источников энергии, повышения энергоэффективности, рационального использования ресурсов и перехода к низкоуглеродной экономике. Также рассматриваются возможности использования таких финансовых инструментов, как зеленые облигации, льготное кредитование, средства международных финансовых институтов и частные инвестиции. В результате исследования обоснована необходимость совершенствования правовых и институциональных механизмов развития рынка зеленого финансирования, направления финансовых ресурсов на реализацию экологически ориентированных проектов, а также создания благоприятных условий для инвесторов. В статье развитие зеленого

финансирования в Узбекистане рассматривается не только как важный фактор обеспечения экологической устойчивости страны, но и как один из механизмов формирования новых инвестиционных возможностей и обеспечения долгосрочного экономического роста.

Ключевые слова:

зеленое финансирование, зеленая экономика, зеленые инвестиции, зеленые облигации, устойчивое развитие, возобновляемые источники энергии, экологические проекты, финансовые механизмы, изменение климата, Узбекистан.

PROSPECTS FOR THE DEVELOPMENT OF GREEN FINANCE IN UZBEKISTAN

Abdusalomova Dilnavoz Soibjon qizi
Tashkent University of Applied Sciences
Faculty of Economics, Finance And
Financial Technologies, 4th-year student
E-mail: dilnavozabdusalomova8@gmail.com

Abstract:

This article analyzes the current state, existing opportunities, and future prospects for the development of green finance in Uzbekistan. The study highlights the importance of green finance in ensuring sustainable economic development, reducing the negative effects of climate change, and providing financial support for environmental projects. Particular attention is paid to financing the development of renewable energy sources, improving energy efficiency, promoting the rational use of resources, and supporting the transition to a low-carbon economy. The article also examines the potential use of such financial instruments as green bonds, concessional loans, funds from international financial institutions, and private investments. The findings emphasize the importance of improving legal and institutional mechanisms for the development of the green finance market, directing financial resources toward environmentally oriented projects, and creating favorable conditions for investors. The development of green finance in Uzbekistan is considered not only an important factor in ensuring the country's environmental sustainability but also a significant mechanism for creating new investment opportunities and supporting long-term economic growth.

Keywords:

green finance, green economy, green investments, green bonds, sustainable development, renewable energy sources, environmental projects, financial mechanisms, climate change, Uzbekistan.